

# **El lamento**

**Anton Maria Lamberti**



**XVIII secolo**

**Esportà da Wikisource el 10/22/18**

## IL LAMENTO

No, no xe vero, Filide,  
Che per cambiar teren  
Se cambi el mal in ben,  
4L'afano in gusto:  
Co xe amalada l'anema  
Per tuto podè andar,  
Ma per tuto portar  
8Con vu la piaga.  
Se fusse mai possibile  
Menar un condanà  
Ne la preson serà  
12Da un polo a l'altro,  
El ciel ridente o torbido  
Nol cambierà de ton,  
Per lu sarìa preson  
16Parchi e zardini.  
Tal so' anca mi; d'un atomo  
Con tuto el mio variar,  
  
No m'ò sentìo a scemar  
20Nel cuor l'afano.  
La tropo cara imagine  
Sempre xe viva in mi;  
No vedo altro che ti,  
24Ti sola sento.  
Ma, cara, oh Dio! do' fulmini  
Quei bei ochi me par,  
E i vedo a condanar  
28La mia fredezza.  
E pur no son colpevole:  
Se ti m'à leto el cuor,  
Ti averà del dolor  
32Visto le marche.  
Perchè quel zorno oribile  
Che t'ò cussì lassà,

No elo stà scancelà  
36Dai dì de l'ano?  
Perchè un destin teribile,  
Perchè un dover tiran  
M'ha de tegnir lontan  
40Da chi è 'l mio tuto?  
Za le infernali furie  
Strazza ogni dì sto sen,  
Sento tuto el velen  
44Dei so' serpenti.  
El sono (che dei miseri  
Sempre l'à bu pietà)

Da dopo che son qua  
48Mai no l'ò visto;  
Nè ò visto che le tenebre,  
El silenzio, el dolor  
A ste noti d'oror  
52Formar cortegio.  
Jer sera un leto morbido  
Non ò possù sofrir,  
Che m'à parso dormir  
56S'un leto d'aghi.  
Son sbalzà su da rabia,  
Al ciel seren so' andà,  
Ch'el gera iluminà  
60De stele ancora.  
Oh! come ò visto placida  
Natura a repossar!  
Oh! quanto a tormentar  
64M'à bu l'invidia!  
Za scomenzava a perderse  
Le stele; e 'l dì vicin  
El cantor matutin  
68Za saludava.  
E solo l'alma Venere  
S'aveva in ciel fermà  
Per compassion, chi 'l sà?  
72De un qualche amante.  
Za andava sbianchizandose  
Verso l'oriente el ciel,

E i zefiri de miel  
76Spruzzava i fiori;  
La bionda Aurora, alzandose,  
Facea col so splendor  
Cambiar in t'un rossor  
80Quela biancura;  
E da quel lume vivido  
Le montagne a indorar:  
E dopo a rossizar  
84Vedeva i coli:  
E 'l raggio vivacissimo  
Del Sol, che avea spontà,  
Rifleteva qua e là  
88Sui prai, sui campi;  
E sora l'erbe morbide  
Che l'andava a ferir,  
Vedevi a comparir  
92Perle e diamanti.  
Chi mai con sto spettacolo,  
Quando nol gera un mi,  
Benedio quel bel dì  
96Non averave?  
E pur l'oror, le tenebre  
Ò bu a desiderar  
Per poder pascolar  
100La mia tristezza;  
Che za no pol un'anema,  
Ch'à perso el caro ben,  
  
Goder più pase in sen,  
104Sentir più gusti.  
Più gnente no la stuzzega,  
Gnente piacer ghe dà,  
Co quel ben no la gà  
108Che la riempiva.  
Ben i se acorze, Filide,  
De la mia situazion,  
E son la derision  
112Dei mii nemici;  
Ma deridème, stolidi,  
De mi ludibrio fè,  
Cussì, no meritè

116D'esser afliti;  
Che st'aflizion, ste lagreme,  
Che me vedè a sgorgar,  
Queste me fa stimar,  
120Non avilirme.

El mio no xe incantesimo  
El vero ama sto cuor;  
Qua no à bisogno Amor  
124De far el mago.

Co 'l voglia d'una Filide  
Qualche cuor impiagar,  
Nol la ga che a mostrar;  
128Xe tropo ancora.

Cussì volesse el barbaro  
Mostrarme el caro ben

Col bel ochio seren,  
132Col bel soriso;  
Cussì, in quel dì teribile  
Ch'ò da vegnirte a dir:  
*O perdona, o morir*  
136*Vedime, cara:*

Quela man adorabile  
Me avesse a solevar;  
Sentisse a pronunziar:  
140*Sì, te perdono.*

Tuti i momenti numero  
Ch'à da portar quel dì,  
Ma tremo in fra de mi  
144Per quel momento.

Sarastu quela Filide,  
Che con tanta pietà  
M'aveva perdonà  
148L'ardir de amarte?

O un altra? Ah no, comovite,  
Pensa in che stato son,  
No zontar aflizion  
152A chi xe aflito.

Nol crederìa provandolo:  
Ti sa' coss'è dolor?  
Mi l'ò visto quel cuor,  
156So quanto el sente.

Sì, el mio lamento, Filide,  
Comoverà quel sen,

E se cambierà in ben  
160Tuto l'afano;  
Terminerà le lagreme,  
Le pene cesserà;  
Quel che no finirà,  
164Sarà, l'amarte.

# Informassion su sta edission eletrònega:

Sto libro eletrònego el vien da la version veneta de la biblioteca digitale [Wikisource](http://vec.wikisource.org)<sup>1</sup>. Sta biblioteca digitale multilengue, fata da volontari, la ga l'obietivo di métar a disposission de tuti el pi gran nùmaro possibile de documenti publicà de qualsiasi tipo: romanzi, poesie, riviste, létere...

El nostro scopo xe de réndar disponibili i libri a gratis, a partir da testi libari da dritti d'autor o soto licensa libara. Podì doparar i nostri libri eletròneghi in maniera totalmente libera, per scopi commerciali o meno, a pato de respetar le clausole de la licensa [Creative Commons Attribution-ShareAlike 3.0 Unported](http://creativecommons.org/licenses/by-sa/3.0/deed.it)<sup>2</sup>, o, a vostra sielta, quele de la licensa [GNU FDL](http://www.gnu.org/copyleft/fdl.html)<sup>3</sup>.

Wikisource la serca senpre utenti novi che daga na man. Par quanto ghe stemo 'tenti, po' darsi che durante la trascrission del testo ne sia scapà qualche error. Podì segnalarli su [sta pagina qua](#)<sup>4</sup>.

Sto libro el xe sta fato col contributo de sti utenti qua:

- Candalua
- SPQRobin
- ThomasBot
- KnightLago and C.Fred Had sex with Britney Spears.
- Andre Engels

---

1. [↑ http://vec.wikisource.org](http://vec.wikisource.org)

2. [↑ http://www.creativecommons.org/licenses/by-sa/3.0/deed.it](http://www.creativecommons.org/licenses/by-sa/3.0/deed.it)

3. [↑ http://www.gnu.org/copyleft/fdl.html](http://www.gnu.org/copyleft/fdl.html)

4. [↑ http://vec.wikisource.org/wiki/Wikisource:Ciacole](http://vec.wikisource.org/wiki/Wikisource:Ciacole)